

# LA QUOTIDIANA

FMR Fundaziun Medias Rumantschas, Via da Masans 2, 7000 Cuirra, 081 544 89 11, redacziun@fmr.ch



## In cudesch divertent or da protocols communal

L'artist Donat Caduff ha tschertgà e chattà passaschas «schregas» en protocols communal.

Pagina 3



## Ils chevaliers en cuirass a Zuoz

La fin d'emna è stà in турниr medieval a Zuoz, il Maister Balaister. Il star indigen: Andri Marugg.

Pagina 11

FMR FUNDAZIUN  
MEDIAS  
RUMANTSCHAS

südostschweiz

## ENGAIDINA

### «D'una vart es que üna cumpensaziun»

In dumengia saira ho Valentina Parolini preschanto sieu prüm crimi per giuvenils «La melodia da la gĩa». L'autura da 30 ans es creschida sü a Samedan ed ho zieva la matura fat la scolaziun scu magistra secundara – cir cul diplom per instruir per rumantsch. Zieva la scolaziun ho la lavuro trais ans a Turich e daspö il 2019 instruesch'la a Küblis. Valentina Parolini nun ho auncha më instruiu per rumantsch, ma ho düraunt la pandemia scrit ün crimi per puter. «D'una vart es que üna cumpensaziun. Ma eau discuor listess mincha di rumantsch cun meu amih», disch Valentina Parolini. L'autura e magistra secundara ho in ün discuors cun la FMR quinto davart sia motivaziun per scriver il cudesch. (fmr/cam)

Pagina 11

## SURSELVA

### In'alp da nuorsas e «ses» lufs



Pia Solèr ei gia per la 21avla gada sill'Alp Scharboda. Ella ei el medem mument cautegia e pastura.

FOTO AUGUSTIN BEELI

Avon 20 onns han ins observau gl'empreu luf en Surselva. Quel era vegnius amiez in territori da nuorsas ed ei sesentius sco ella tiara dalla cucagna. Lu era Pia Solèr, pastura da Vrin, il secund onn ell'Alp Scharboda. Uonn eis ella per la 21avla gada responsabla per 1400 nuorsas che passentan la stad sin sia alp. La stad 2022 ei speciala per pliras raschuns. Inagada influenzescha il clima l'alpegiazun, e dapi miez fenadur era il luf. Viu il cumpogn han Pia Solèr e Leo Alig aunc mai. L'Alp Scharboda ei in territori spuret, selvadi e solitari denter Péz Terri, Péz Scharboda e Frunthorn. La proprietaria ei el medem mument cautegia e pastura. Ell'intervesta culla FMR appellescha ella ch'ins stoppi prender mesiras urgentas per salvar l'alpegiazun. Ei sappi buc esser che l'alp detti alloschi a 1400 lufs e nulla nuorsas. El vast e grond territori han ils tgauns da schurmetg buca saviu impedir las attaccas. (fmr/abc)

Pagina 6

## GRISCHUN CENTRAL

### Premiera per Alvaschagn

L'Associaziun Center d'Art e Cultura Alvra èn en'unioniun tg'exista siva digl onn 2021. Igl intent dall'unioniun è da vitalisar la regiun Alvra e la vischnanca d'Alvaschagn. Egn da differents projects tgi sa focusseschan sen art, cultura e nateira è igl impreu kino agl liber ad Alvaschagn. Igl colp da partenza è succedea gievra passada. Malgro la plievra on var 10 persungas catto la veia ainten l'antieriura tgesa da scola dad Alvaschagn. Ed uschia on els an pe da segl pastg pudia sa tschantar directamaintg sen la tribuna cuvreida cun tetg. Las alas avertas on tuttegn procuru per en tant atmosfera dad open air. (fmr/sab)

Pagina 8

## Center d'asil a Cuirra mida chasa

Suenter in temp da construcziun dad in onn e mez vegn il nov Center chantunal per novs requirents e novas requirentas d'asil a l'ur da Cuirra avert uffizialmain.

MARTIN GABRIEL/FMR

«Quest edifiz è in term impurtant per nossa independenza sin il sector da la politica da migraziun», ha il schef dal Departament d'infrastructura, energia e mobilitad, Mario Cavigelli, ditg en occasiun da l'act d'avertura glindesdi avantmezdi a Cuirra.

#### Center en vestgi da lain

Enfin il settember èsi uschè lunsch che las 93 requirentas e requirents d'asil pon midar lur domicil dal center Foral a Cuirra vest en il nov cen-

«Quest edifiz è in term impurtant per nossa independenza sin il sector da la politica da migraziun.»

Mario Cavigelli  
cusseglier guvernativ.

ter en vestgi da lain en il Meiersboden. Il bajetg nov sper Cuirra sin il territori da la vischnanca da Churwalden dat alloschament a 180 persunas. A las requirentas ed als requirents d'asil stattan a disposiziun chombras da dus, da quatter e da sis letgs sco er locals communabels da segiurn, d'alimentaziun, da sanita e da lavar. Plinavant porscha il center per l'emprima registraziun localitads da scolaziun per il program da scola da linguas, ina cuschina da scolaziun sco er in local da project. Ils custs totals per il nov edifiz muntan ad 8,6 milliuns francs.

Pagina 2

«Cur ch'eau d'he alura scuviert il trer cun l'arch a chavagl d'he schmiss da fer passlung.»

Ed entant è Andri Marugg da Zuoz daventà in vair Dario Cologna en quest sport da nischa che Dschingis Khan appreciava gia – Pagina 11



FOTO DAVID TRUTTMANN

## Ina muntogna fa festa

Questa sonda passada è la nova vischnanca fusiunada Muntogna da Schons finalmain vegnida inaugurada. En tenda a Donat han var 200 abitants ed abitants fatg festa sin l'emprim onn d'existenza da lur «vaschinadi». La fusiun da las quatter anteriuras vischnancas è numnadain ida en vigur l'entschatta 2021, amez la pandemia. Sonda ha era il regent Christian Rathgeb purtà ils salids si da Cuirra. Ed el ha encuraschè – cun in applaus – ils tschintg giuvens suprastants da cuntinuar cun lur lavur. (fmr/dat)

Pagina 9



20034



Servetsch d'abunents e da  
distribuziun: tel. 0844 226 226  
mail: abo@somedia.ch

9 771424 749004